



Nuuk, 10. Juni 2014

Inatsisartut Suleriaasianni § 37 naapertorlugu matumuuna Kalaallit Nunaanni imminut toquttarnerup pinaveersimatinniarnernanut tunngatillugu apeqquteqaateqaqqillunga Naalakkersuisunut imaattunik apeqquteqaateqarpunga:

(Inatsisartunut ilaasortaq Juliane Henningsen, Inuit Ataqatigiit)

Apeqqutit:

- 1) Imminut toquttarnerup pinaveersimatinniarnernanut Kalaallit Nunaanni 2013-2019-mut iliuusissiap ukiami oqallisigineqarnerani ulloq unnuarlu oqarasuaattikkut attavigineqarsinnaasumik akeqanngitsumik ammatitaqarnissamut partiit tamarmik tapersuinerat aallaavigalugu Naalakkersuisut 20. december 2013-imi akissutaat innersuutigalugu ajornartorsiut pillugu misissueqqissaarneq sukumiisoq pillugu killiffik apeqqutigerusuppara. Misissueqqissaarneq qanoq inerreqarpa ullorlu unnuarlu oqarasuaammik ammatitaqarneq pivaveersimatitsiva iluaqutissartaqarpalu?**
- 2) Naalakkersuisut internetti atorlugu imminut toquttarnermut pinaveersimatitsinermi annerusunik iliuuseqarnialersaernerlutik?**
- 3) Apeqqutigerusuppara Naalakkersuisut inunnut imminoriarsimasunut inatsisitigut tunngaveqartumik katsorsarneqarnissamik pisinnaatitaaffeqarnermik eqqussinissamik eqqarsaateqarnerisut, tassa inuit imminoriarsimallutik peqqinnissaqarfimmiit aallunneqartut sapaatip akunnerata ataatsip iluani katsorsarneqarnissamik ikiorneqarnissamillu neqeroorfigineqarsinnaanngorlugit, aammalu piffissap aalajangersimasup iluani imminornissamik ulorianartorsiortut ikiorneqarnissaannik neqeroorfigineqarsinnaanngorlugit.**
- 4) Imminut toqussimasunut imminoriarsimasunullu qanigisat tapersorneqarnissaannut ikiorneqarnissaannullu neqeroorfigineqartarnissaat qanoq qulakkeerreqassava, Naalakkersuisullu qimataasut taperserneqarnissaannut qulakkeerisumik siunnersuutissaqarpat?**

5) Nuna tamakkerlugu imminut toquttarnerup pinaveersimatinniarnernanut atatillugu iliuusissiap piviusunngortinnissaanut killiffik qanoq isikkoqarpa, pineqartulu ilaanni piviusunngortitsinissamut pilersaarut malinneqanngitsoorpa?

Tunngavilersuutit

Ukiuni kingullerni qulini imminut toquttartut amerlassusaat appariarsimangillat, allanngorarlunili. 2005-miit 2010-mut agguaqatigiisillugu inuit 46-47-it ukiumut imminnut toquttarput.

2013-2019-imut imminut toquttarnerup pinaveersimatinniarnernanut nuna tamakkerlugu iliuusissiaq UKA 2013-imi oqallisigineqarpoq, iliuusissiamilu ataatsimoorussamik iliuuseqarnissaq qitiuvoq.

Taamaattumik decembarimi 2013-imi iliuusissiamut § 37-i naapertorlugu apeqquteqarninni akissutisiakka pakatsissutigaaakka.

Imminut toquttoqaraangat alianangaartuaannarpoq, ilaquttanullu qimagaasunut, ikinngutaasunut qimagaasunullu allanut annaasaqarnerup oqaasinngortinnissaa ajornakusoortaaq. Nunatsinnilu imminut toquttarnerup naliginnaalersimanera taamatulli alianartigivoq, aappariit ilaqutariillu akornanni oqqattoqarsimatillugu imminut toqunnissamut siorasaarinerit atugaaqaluni, - tamanna akuerineqarsinnaanngilaq. Nutaamik iliuusissiuusagutta sapinngisamik piaarnerpaamik tigussaasumik pilersaarusiortariaqarpugut.

Iliuutsit pingaaruteqartut saqqummiunneqassapput, siunertamittullu sunniuteqarnissaat kisaatigiinnarsinnaavarput. Nukiit annertunerusut atorneqartariaqarput – Naalakkersuisullu siunnersuuteqartariaqarput. Imminummi toquttarnerit imminoriartarnerillu ikilisinneqarnissaat anguniagaavoq. Inuit artornartunik nalaatassaqaarlutik inuuneqarnissamik piareersarimanissaat pisariaqarpoq. Inuttut ilivitsutut inerinnissarput aalluttariaqarparput, timikkut isummatigullu. Ukua apeqqutigeqqikkusuppakka:

Oqarasuaat ulloq unnuarlu attavigineqarsinnaasoq – oqarasuaat internetilu atorlugit iliuusissiap oqallisigineqarnerani partiinit tamanit tapersorneqarpoq.

Oqallinnermi Inuit Ataqatigiit siunnersuutigivaat ulloq unnuarlu attavigineqarsinnaasumik oqarasuaateqassasoq, tassami attavimmik taamaattumik internetimullu attavilerneqarsinnaasumik periarfissaqarnissaa pisariaqartinneqartoq erseqqippoq. Tassuunatigut apeqqutit suulluunniit inuunermut tunngasut apeqqutigineqarsinnaassapput. Partiit tamarmiulluta isumaqatigiinnerput Naalakkersuisup akisussaasup, Steen Lyngep, atorluartariaqarparpa, tassami Kisimiinngilatip oqarasuaataa 2008-mi inunnit imminut toqunnissamut ulorianartorsior-

tunit 350-init amerlanerusunik atorpeqarpoq. Kisitsisillu takutippaat pisariaqartitsineq suli taamatut annertutigisoq.

Iliuusissiami innuttaasut avinngarusimasuniittut pingaartumik pineqarput, taakkualu allatuulli saaffiginninnissaminut periarfissaqarnissaat qulakkeertariaqarparput.

Imminut toquttarnerup pinaveersimatinniarnani interneti atorlugu suli atunngisatsinnik periuseqassaaq. Imminut toquttarnermut pinaveersimatitsinermi interneti aqutigalugu paasisitsiniutit, aammali allaqatigiittarfiit toqqaannartumillu siunnersorneqarsinnaanermik periarfissat immaqa pingaartumik inuusuttunit atorpeqarusussinnaasut aqutissaasinnaapput. Nunatsinni innuttaasut ilaqutariillu tamarmik imminut toquttarnerup ajornartorsiuteqarnermi aqutissaannginneranik oqaasertalersuinissaannut iliuutsinik pisariaqartitsisugut tikkuarusuppara.

Tamatumalu saniatigut apeqqutigerusuppara Naalakkersuisut inunntut imminoriarsimasunut inatsisitigut tunngaveqartumik katsorsarneqarnissamik pisinnaatitaaffeqarnermik eqqussinissamik eqqarsaateqarnermut, tassa inuit imminoriarsimallutik peqqinnissaqarfimmiit aallunneqartut sapaatip akunnerata ataatsip iluani katsorsarneqarnissamik ikiorneqarnissamillu neqeroorfigineqarsinnaanngorlugit, aammalu piffissap aalajangersimasup iluani imminornissamik ulorianartorsiortut immikkut ikiorneqarnissamik neqeroorfigineqarnissaat qulakkeerlugu.

Tamatuma saniatigut imminut toqussimasunut imminoriarsimasunullu qanigisat taperserneqarnissaannut ikiorneqarnissaannullu ullumikkut neqerooruteqarnermut paaserusuppara.

Apeqqutit ullut suliffiusut qulit iluanni akineqarnissaat kissaatigaara.